

9 NMP baru dipilih bagi penggal baru

Antaranya Ketua Khidmat Kewangan Masyarakat Islam Maybank Singapura, Ismail Hussein, satu-satunya calon Melayu/Islam



ENCIK ISMAIL HUSSEIN

12 Aug 2014

ERVINA MOHD JAMIL

SERAMAI sembilan calon termasuk seorang ahli perbankan Melayu telah dipilih Jawatankuasa Pilihan Khas untuk dilantik sebagai Anggota Parlimen Dilantik (NMP).

Ketua Khidmat Kewangan Masyarakat Islam Maybank Singapura, Encik Mohd Ismail Hussein, 51 tahun, juga pengarah Angkatan Karyawan Islam (AMP), menjadi NMP Melayu keempat sejak skim itu diperkenal 24 tahun lalu.

"Saya percaya, peranan sebagai NMP ini memerlukan seseorang menangani isu yang dihadapi warga Singapura, tanpa mengira bangsa atau agama.

"Namun, saya akan berusaha mengutarakan isu yang khusus bagi masyarakat Melayu/Islam yang... juga menjejaskan semua warga Singapura," kata Encik Mohd Ismail yang juga merancang memberi tumpuan pada isu kos sara hidup serta isu penduduk apabila dilantik nanti.

Hanya terdapat tiga NMP Melayu sejak skim itu diperkenal pada 1990 - Cik Faizah Haji Ahmad Jamal (2012-2014); Encik Imram Mohammed (1992-1996); dan Encik Zulkifli Baharudin (1997-2001).

Calon lain dilantik jawatan NMP itu ialah Ketua Pusat Perubatan Sukan Changi di Hospital Besar Changi, Dr Benedict Tan; Presiden Persatuan Cacat Anggota, Cik Chia Yong Yong; Presiden Dewan Perniagaan dan Perusahaan Cina Singapura, Encik Thomas Chua; naib presiden Kongres Kesatuan Sekerja Kebangsaan, Encik Karthikeyan R. Krishnamurthy; usahawan, Cik Kuik Shiao-Yin; Presiden Lembaga Arkitek Singapura, Cik Rita Soh; Timbalan Pengarah Pusat Kajian Gunaan Universiti SIM, Profesor Madya Randolph Tan; dan Naib Provos (Kehidupan Pelajar) Universiti Nasional Singapura, Profesor Tan Tai Yong.

Presiden Tony Tan akan menyerahkan Surat Pelantikan kepada NMP di Istana pada 26 Ogos ini sebelum mereka mengangkat sumpah apabila Parlimen bersidang pada 8 September ini.

Speaker Parlimen, Cik Halimah Yacob, berkata jawatankuasa yang diterajuinya telah menimbang kemampuan calon menyumbang idea alternatif dan perspektif baru bagi membantu Singapura menghadapi cabaran pada hari muka.